



**TEKS**

**KHUTBAH**

**NEGERI PAHANG**

**MEI 2026**



## HARI GURU

15 MEI 2026M / 27 ZULKAEDAH 1447H

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ

سَيِّئَاتِ أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدَهُ

وَرَسُولَهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ

أَجْمَعِينَ.

أَمَّا بَعْدُ،

فِيَا عِبَادَ اللَّهِ، اتَّقُوا اللَّهَ وَأَوْصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Bertakwalah kepada Allah ﷻ dengan sebenar-benar takwa, laksanakan segala perintah-Nya, dan tinggalkan segala larangan-Nya. Mudah-mudahan kita diberkati Allah ﷻ di dunia dan akhirat.



## **Sidang Jumaat yang dirahmati Allah Ta'ala**

Pada tarikh 16 Mei setiap tahun, seluruh warga guru diraikan dalam majlis sambutan hari guru sebagai satu pengiktirafan yang tinggi oleh masyarakat kepada guru yang telah banyak berjasa terhadap pembangunan insan dan negara. Sewajarnya masyarakat meletakkan taraf guru sebagai insan mulia sesuai dengan sumbangan yang dicurahkan mereka dalam mendidik anak bangsa.

Profesyen perguruan adalah kerjaya mulia yang menjadi pemangkin kegemilangan ilmu dan kemajuan ummah serta pembentukan insan yang seimbang rohani dan jasmani. Guru bukan sekadar menjadi *mudarris* (pengajar), tetapi hendaklah berperanan sebagai *muallim* (penyampai ilmu yang benar), sebagai *murabbi* (pengasuh yang mendidik dengan kasih sayang), sebagai *muaddib* (pembentuk adab dan akhlak pelajar), sebagai *muzakki* (penyuci akhlak dan akidah), sebagai *muthabbit* (pembina keyakinan dan kekuatan dalaman pelajar), sebagai *qudwatun hasanah* (memberi contoh yang baik terhadap anak didik) dan sebagai *mursyid* (pembimbing ke arah kebenaran).

Tugas seorang guru bukanlah satu tugas mudah yang boleh dilakukan oleh semua orang. Justeru, kerjaya sebagai seorang guru dianggap sebagai satu tugas yang sangat mulia dan istimewa. Lebih-lebih lagi dalam era yang penuh mencabar ini, menuntut pengorbanan dan komitmen yang padu dalam mendidik anak bangsa menjadi insan yang cemerlang dan berakhlak mulia. Kemuliaan tugas guru ini diiktiraf oleh Allah ﷻ, sebagaimana firman-Nya dalam surah al-Mujadalah ayat 11,



أَعُوذُ بِاللَّهِ مِنَ الشَّيْطَانِ الرَّجِيمِ

يَرْفَعُ اللَّهُ الَّذِينَ ءَامَنُوا مِنْكُمْ وَالَّذِينَ أُوتُوا الْعِلْمَ دَرَجَاتٍ

**Yang bermaksud;** “Allah meninggikan darjat orang yang beriman dalam kalangan kamu dan orang yang diberi ilmu pengetahuan beberapa darjat”.

Masyarakat seharusnya bersyukur atas pengorbanan dan jasa guru yang telah mendidik serta membimbing anak bangsa menjadi manusia yang baik pada hari ini, khususnya guru yang mengajar mengenal membaca ayat-ayat al-Quran, fardu ain dan sebagainya. Tanpa bimbingan dan tunjuk ajar daripada mereka, umat tidak akan mempunyai asas yang kuat untuk mengamalkan ajaran Islam.

### **Sidang Jumaat yang dimuliakan,**

Memandangkan kedudukan guru itu sangat mulia, sewajarnya kita sama-sama berdoa ke hadrat Allah ﷻ agar guru-guru yang telah mendidik kita mendapat rahmat dan keberkatan sepanjang masa. Manakala bagi guru-guru yang telah kembali ke rahmatullah sama-samalah kita mendoakan semoga Allah ﷻ mengampunkan dosa-dosa mereka.

Para pelajar hendaklah sentiasa menghormati guru dan tahu membalas budi guru dengan menjaga adab-adab seperti memberi salam apabila bertemu dengan



guru, menjaga maruah guru dan jangan sekali-kali cuba mencari kesilapan dan keaiban guru, bersikap sopan apabila bercakap dengan guru dan tidak membantah atau melawan arahan guru serta jangan menyakiti hati guru bagi mendapatkan keberkatan ilmu yang dipelajari.

Para ibu bapa seharusnya menggalakkan anak mereka supaya sentiasa menghormati dan mentaati arahan guru. Suatu perkara yang sangat menyedihkan zaman sekarang apabila ada ibu bapa yang sanggup menyerang dan menyaman guru apabila anak mereka dikenakan tindakan tegas kerana kesalahan disiplin di sekolah. Suasana ini boleh menyebabkan kesan negatif terhadap hubungan guru dengan ibu bapa dan murid tersebut. Di samping itu tindakan ibu bapa ini boleh menghilangkan rasa hormat murid terhadap guru. Sabda Rasulullah ﷺ dalam hadis yang diriwayatkan oleh Imam Muslim:

كُلُّ مَوْلُودٍ يُوَلَّدُ عَلَى الْفِطْرَةِ، فَأَبَوَاهُ يُهَوِّدَانِهِ، أَوْ يَنْصُرَانِهِ، أَوْ يِمَجِّسَانِهِ

**Yang bermaksud;** “Setiap anak Adam dilahirkan dalam keadaan fitrah, maka kedua ibu bapalah yang mencorakkan keadaan anak itu, sama ada menjadi seorang Yahudi, Nasrani atau Majusi.”

Oleh itu pihak ibu bapa seharusnya memberi kepercayaan sepenuhnya kepada guru dalam membentuk dan mendidik anak-anak mereka menjadi insan yang berguna kepada keluarga, masyarakat dan negara. Tiada guru yang sanggup merosakkan masa depan anak muridnya.



Hubungan baik antara ibu bapa dengan pihak sekolah amat penting agar usaha mengasuh dan mendidik anak-anak berjalan dengan lancar dan sempurna. Ibu bapa dan masyarakat juga perlu menjalin hubungan yang erat dan berterusan dengan pihak sekolah agar setiap permasalahan yang ditimbulkan oleh anak-anak dapat diselesaikan secara muhibah.

### **Sidang Jumaat yang dikasihi,**

Kesimpulan khutbah hari ini ialah memuliakan guru adalah suatu tuntutan syarak sesuai dengan sumbangan yang dicurahkan mereka dalam mendidik masyarakat. Bersyukurlah atas pengorbanan dan jasa guru yang telah mendidik dan membimbing masyarakat menjadi manusia yang berguna pada hari ini. Para pelajar hendaklah sentiasa menghormati guru dan tahu membalas budi mereka. Ibu bapa sewajarnya memberikan kepercayaan sepenuhnya kepada guru dalam membentuk dan mendidik anak-anak mereka menjadi insan yang berguna.

أَعُوذُ بِاللَّهِ مِنَ الشَّيْطَانِ الرَّجِيمِ

هُوَ الَّذِي بَعَثَ فِي الْأُمِّيِّينَ رَسُولًا مِّنْهُمْ يَتْلُوا عَلَيْهِمْ آيَاتِهِ وَيُزَكِّيهِمْ وَيُعَلِّمُهُمُ

الْكِتَابَ وَالْحِكْمَةَ وَإِن كَانُوا مِن قَبْلُ لَفِي ضَلَالٍ مُّبِينٍ ﴿١٢٩﴾



بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ  
الْآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ  
الْعَلِيمُ. أَقُولُ قَوْلِي هَذَا وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ  
وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.